



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tir\_yimym

yt tir yimym

TAPAK 8

**Palestine nunger north Gaza-i meyipa shilanger**

**Bumrah nem ICC Men's Test Cricketer of the Year naroküm agütsüogo**



VOL. XXII ISSUE NO. 104 (ADOK 104) DIMAPUR SANGTENNÜ (TUESDAY) AENJETI (JANUARY) 28, 2025 ₹ 5.00

## NPCC-i lungkak aitba sentong ka agi

**Dimapur, January 27, 2025 (TYO):** 'Jai Babu, Jai Bhim, Jai Samvidhan Abhiyan' kübok shilem ka ama Nagaland Pradesh Congress Committee (NPCC)-i Congress Bhavan, Kohima nung lungkak aitba sentong ka agiogo. Iba sentong ajanga Dr. B.R. Ambedkar nem tetushi agütsütsü aser Indian Constitution ajungkettsü nukjidong nung agir. "BJP-i Father of the Constitution Dr. B.R. Ambedkar anema jembiba aser Constitution ajembangtsü merangba anema lungkak aiter" ta Lok Sabha MP aser PCC President S Supongmeren Jamir-i ashi. Congress Party-i constitution

nung lateta aliba kümzüka ayutsü aser nisung ajak asoshi temeten agütsütsü temulung agütsür, ta pai ashi.

"BJP-i maparen inyakba ajanga Constitution tamendakdak raksatsür aser Ambedkar o Gandhi na indang senmangtem tenüng menüksür" ta NPCC Working President Khriedi Theunuo-i ashi.

"India ama linük ka nung Constitution medeni nübertem nem temeten magütsütetsü aser taginübatem metongtetsü. Constitution nung lateta aliba ajanga dang linük nung telongjem aser democracy wazüka yutetsü" ta Theunuo-isa ashi.

## Indo-Myanmar arrtsü atsüdangba osang lemsatep

**Imphal, January 27, 2025 (Agencies):** Manipur Governor Ajay Kumar Bhalla dang Manipur sector nung Indo-Myanmar arrtsü atsüdangba osang lemsatepogo. Hombor nikonngdang Border Road Organisation Director General Lieutenant General Raghu Srinivasan den Inspector General of Assam Rifles (IGAR) South na den ketdangsürtemi Raj Bhavan, Imphal nung Manipur Governor Ajay Kumar Bhalla den ajurutep. Director General-i Governor Bhalla den Indo-Myanmar nung tang atsü atsüdangba maparen osang lemsatep. Iba ya security akangshitsü aser arrtsü ajanga ozüng alema inyaksangshiba azüoktsü atema lir ta pai ashi.

Border Roads Organisation (BRO) nem atsü kilometre 20.862 aser lenmang yanglutsü mapa lemsütsüogo aser ibaji inyakdar ta Raghu Srinivasan-i ashi. Centre-i Moreh nung kilometre 9.214 atsüdangogo. Moreh ya India-Myanmar arrtsü anasa Manipur nung tongti shishilembadak ka lir.

India-Myanmar arrtsü ya kilometre 1,643 lir aser Manipur (398 km), Arunachal Pradesh (520 km), Nagaland (215 km) aser Mizoram (510 km) den arrtsütepa lir.

India sorkari Rs 31,000 crore endoka Myanmar den kilometre 1,643 arrtsü atsüdangtsü sentong lir ajisüaka Naga aser Kuki nunger telok balalai iba mapa anema noktaker.

## Ungma yimdak ki ana mitsü küma rungtok aser ka aonpo nungi kentet



**Mokokchung, 27th JAN (TYO):** Jan 27 anepdang 9:00 ako meta Ungma yimdak Aong mepu nung kitsük kirung lendong tulu adoka ki ana mitsü küma rungtok aser ki kabo tera dang arung, ta iba osangbeneri Ungma Village Council Chairman, Nungshilepden aser Mokokchung nung police ketdangsür ka den jembidang metetdaksü. Tia junga rongsen jenti takoksa ajuruba dak alaka iba lendong nung asü-ama aser yiruyibongba osangbo kecha maliasü. Iba kirung lendong ataloker osang agütsüba sülen mapang tatsüka tsünga nung fire brigade pur arua

yaritepa liasü ta Ungma VCC-i ashi. Mi ji kechi nungi adok kuli mejangja aser iba mi lendong atalokdang kidang shinga maliasü, anungji, mi ji koma sür adok, iba indang kuli bushisüngdang tenzüko, ta police ketdangsüri metetdaksü. Iba kitsük-kirung lendong nung takoksa ajuruba rongsen asadanga lakh 20 dak tali adoker, ta paisa shisem.

Iba lendong nung district administration-i anir police, SDRF, Assam Rifles, fire brigade aser teyariteper ajak dang kanga pelaba Ungma Village Council Chairman-isa metetdaksü.

## Nagaland Chief Secretary-i TB samatsütsü ayongzük



**Kohima, January 27, 2025 (TYO):** Nagaland Chief Secretary J. Alam-i District Commissioners (DCs) ajak dang meyipa reprangshiba sendentem amentsü aser local civil society organizations (CSOs) arogo lennirtem aser tanga lokti lennirtem den amalitepa TB samatsüba maparen inyaksü ayongzükogo. Hombarnü Secretariat Conference Hall nung Administrative Heads of Departments (AHODs) aser Heads of Departments (HODs) den senden ka amendang Chief Secretary Alam-i iba temepishiba agütsü.

December 7, 2024 nü Prime Minister-i tenzütsüba 100-day TB elimination campaign nung rangloker iba senden amen.

Nagaland kübok Kohima, Mon aser Wokha densema linük nung district 347 tashi high-incidence districts ta jangjaogo aser shimteta lir ta Alam-i ashi.

"Iba campaign ya asenok atema kanga tongtipang lir kechiyong TB anepalu mesüi yutsüba ajanga menatepba dang masü saka taküm samar. Tekaratiba nung TB anepalutsüla aser senotsüa tajemba endoktsü" ta pai ashi.

Iba programme kübok outreach aser awareness actions aika nungdaker kechiyong iba ajanga TB alir ajak puteta anepalutetsü ta Alam-isa ashi.

Ajaki külemi yaritepba ajanga 100-day campaign takok

angutsü aser Nagaland nung TB samatsütsü ta Chief Secretary-isa metetdaksü.

Health and Family Welfare Department Commissioner Secretary Anoop Khinchi-ia "India nung public health tayongzükba tulutibaji TB lir" ta ashi.

"Kümshia India nung nisung lakh 28 dak TB tasen aliba puteter aser TB ajanga kümshia nisung lakh 3.5 shi taküm samar. TB aser undernutrition sendaktepa lir aser TB agi shirangertem nem chiyungtsü tajungba agütsüba ajanga tajungba akümer" ta Anoop Khinchi-i ashi.

Pradhan Mantri TB Mukta Bharat Abhiyan ajanga TB agi shiranger nem nutritional support agütsür aser iba ya alima nung "crowd-sourcing effort" tulutiba kümogo ta paisa ashi.

"India sorkari Nikshay motion ajanga senotsü teyari agütsür, TB agi shiranga anepaluru shia nem ita nung Rs 1000 agütsür" ta Khinchi-i ashi.

Iba maparen ajanga loktii TB agi shiranger nem nutritional support agütsüba nung shilem agir aser temang anepaluba nung yariteper ta paisa shisem.

"Nagaland nung tang TB agi shiranga anepaluru nisung 3843 lir. AHODs aser DCs ajanga peipei office nung aser nübertem dang TB anepalu süteter, taneptsü angur aser noktangteter ta asüba osang prokshitsüla" ta Khinchi-isa ayongzük.

"100-day campaign nung

shilem ka ama Nagaland nung TB samatsütsü atema mapa meranga inyaka arur. Ajisüaka iba campaign metenzükdang nungi National Strategic Plan (NSP) 2017-2025 ama sentong balala kübok mapa inyaka arur" ta National TB Elimination Programme State Programme Officer Dr. Vezokholu Theyo-i ashi.

Nagaland nung mapa takok ngua inyakdar aser TB menatepba aser nisung asüba ajema kümogo ta Dr. Theyo-isa ashi.

"Iba campaign ya TB putetsü, iba tashidak ajanga nisung asüba ajemdaktsütsü aser menatepba noktangtsü atema agir. Talisa Kohima, Mon, aser Wokha district tem nung item maparen inyaker aser x-ray screenings, molecular testing, o outreach activities amala densema inyaker" ta lai ashi.

Iba campaign nung shiranger nem nutritional support agütsür aser sendaktepa alirtem o department temi community awareness aser support activities nung shilem agir ta laisa shisem.

TB anema rara nung loktii shilem agütsüla aser Nikshay Poshan Yojana kübok TB agi shiranger nem tenla agütsür ta Dr. Theyo-isa ashi.

Iba senden nung Commissioner Nagaland Vyasan R menden liasü aser Chief Secretary Alam-i anir ketdangsürtemi TB-Free Bharat pledge agia liasü.

## Linük nüjiso anguba sülen tang mezüng atema electricity angur

**Raipur, January 27, 2025 (Agencies):** Linük nüjiso anguba sülen tang mezüng atema Chhattisgarh nung yimtsüng ka nung electricity tongogo.

Iba yimtsüng ya Chilkapalli lir aser Bijapur district headquarters nungi kilometre 50 shi pilar lir. India nüjiso anguba sülen nungi iba yimtsüng nung electricity maliasü aser Niyad Nellanar Yojana kübok electricity agütsüogo.

"Taruba itatem ano yimtsüng aika nung electricity agütsütsü" ta Bijapur Collector Sambit Mishra-i ashi.

"January 23 nü Chilkapalli yimtsüng nung electrification asüba atema kanga pelar. Onoki electrification asüba nung iba ya yimtsüng trokbuba lir aser taruba

itatem ano yimtsüng talila electrify asütsü" ta Sambit Mishra-i ashi.

'Niyad Nellanar Yojana' ta Chhattisgarh Chief Minister Vishnu Deo Sai lenisüba kübok state sorkari inyaker.

Iba scheme ajanga meta talang aliba lisapur yimtsüngtem nung nungdakba agütsütsü meranger. Iba scheme ajanga "ideal villages" kümdaktsütsü meranger aser housing, electricity, drinking water, roads, bridges, o schools amala services agütsür.

Chilkapalli nung electricity atongba ajanga yimdaklirtem tajangzük angur. "Tesüiba nung yangi electricity mali saka tangbo tongogo. Sorochioktsü atema aser tanurtem aonung lesson

bushitsü atema kanga tajung" ta lisapur tetsür kati ashi.

"Tang onok electricity angur anungji onoki TV reprangtetsü, sorochiok sütetsü aser tetsübu melii aonung kima nung senzütetsü" ta Chilkapalli nung alir kati osangbener dang ashi.

Chilkapalli nung electricity bener arutsü kanga tasak liasü aser ita 3-4 shi agi ta Bijapur nung electricity department nung inyaker kati ashi.

"Electricity mali senzusenbongtsü kanga tasak liasü. Sorkar ketdangsürtemi yimdaklirtem den jembiba aser electricity bener aru. Sorkari electricity agütsüogo aser tang nungibo pamoki per aser scorpions nungi kümzüka litetsü ta yimdaklirtemi ashir" ta paisa ashi.

## TR Zeliang-i PWD Guest House semzüksü



**Dimapur, Aenjeti/January 27 (TYO):** Deputy Chief Minister, In-charge of Planning & Transformation, National Highways, TR Zeliang-i January 27, 2025 nü Jalukie Town nung Minister, PWD (H) & ME, Bashangmongba Chang lia PWD Rest House ka semzükja liasü.

Iba sentong nung jembidang, ibai guest house aliba indang masü saka Jalukie aser Peren tejakleni anir aotsü atema lir, ta Zeliang-i ashi.

Ki tasen ya junga anepalu mesüra küm ishika tsüngta shisaa aotsü, anungji ki yangluba sülen anepalutsü ya tongtipang akumer.

Guest house ya private entrepreneurs nem mapang telatet ka asoshi agüja amshidaksü nung ajungtsü südi, ta pai ashi aser Department dang telok anaprong ajangzüksü asoshi ibaji bilemdangtsü ajungshia liasü.

Minister, PWD (H) & ME, Bashangmongba Chang-ia iba sentong nung o tatsüka jembidang, iba guest house nokdaktetba ya Nagaland tesem ajungalen ki o jen tajungba aser timba kuma yanglutsü state sorkari bendanga agütsür inyakba temaitsü lir, ta ashi.

Jalukie ya sobaliba takar aser tongtipang tesem ka lir, anungji ketdangsurtem

tongtipang nisungtem aser shishilepartem senzüdang anisungzüksü nungdakba peritsütsü asoshi ki o jen tajung langa lir, ta pai ashi.

Iba guest house ya anisungzüksü atema kisüng masü saka region nung administrative mapa tajungtiba nung inyaksü asoshi tongtipang tesem ka akumtsü imlar, ta Minister Bashangmongba Chang-i ashi.

Paisa nürburtem dang iba ki o jen pei meyong ama anepalua amshitsü ayongzüka liasü.

Iba guest house ya sen 3.21 crore agi yanglu, kong dormitory, bedrooms, dining hall, kitchen aser care taker quarter keta lir.

## Dept. of Health & Family Welfare-i CMHIS atema metetdaksür

**Dimapur, Aenjeti/January 27 (TYO):** Department of Health and Family Welfare ajanga CMHIS Government Employees and Pensioner (EP) ajunga dang temang anepalutsü asoshi taoba mapang sangdonga aliba permissible reimbursement period atsilangtsüogo, ta sangdong ka nung ashi.

Reimbursement period tasenba ya November 1, 2022 nungi March 28, 2024 tashi atsilangtsür.

Iba mapang atsilangtsüba ya taoba nung sangdonga aliba November 1, 2022 nungi December 31, 2023 mapang melentsür.

**Sangdong kübok teinyatsü, aser meteta alitsü kar:**

1. Sangdong ajangasa ashiba agi, beneficiary nungi Medical Allowance agizükba sülen mozüki nung temang anepalurtem CMHIS kübok empanelled hospital nunga süang mesüra MR scheme tejenba küboka süang, temang anepaluba nung indokba reimbursement ya CMHIS (EP) küboki aittsü.

2. Government employees tem atema treatment ya beneficiary nungi Medical Allowance magizükdang agia lira, treatment ya CMHIS kübok empanelled süa aliba mozüki nunga agir liang mesüra MR scheme tejenba küboka agia liang, temang anepaluba nung

indokba sen reimbursement ya MR scheme tejenba küboki aittsü.

3. Sl. No 1 aser Sl. No. 2, anaprong reimbursement atema tsünglanglen agüja aliba terms and conditions alitsü:

a) Cost of treatment ya approved CMHIS (EP) Health Benefit Package rate nung aliba ama mesüra NHPS kübok kumteta aliba State Medical Committee ajanga recommendation agütsüba ama asadanger agütsütsü.

b) Reimbursement ya w.e.f 1st November 2022 nungi 28th March 2024 tsüngta treatment agir alirtem atema dang alitsü.

Claim Submission Process: Reimbursement claims agütsütsü atema nisung ajaki pei indang applications den nungdakba documents tem Official CMHIS portal <https://cmhis.nagaland.gov.in/> nung upload sütsütsüla.

Claim submission process nung timtem majurutsü asoshi CMHIS indang website <https://cmhis.nagaland.gov.in/category/user-manual> nung guidelines tejangja agüja lir.

Anungji nisung ajaki iba teyari agitsü asoshi deadlines tasenba meteta guidelines sülen anidaksüla aser ano tali tejangjaba nung metetener temi Toll-Free Number 1800-202-3380 ajanga jembitsü akok, ta sangdong ajangasa ashi.

## Minister Kruse-i Atoizu Horticulture Farm semdang



Minister, Horticulture, Salhoutuonuo Kruse-i January 27, 2025 nü Atoizu Horticulture Farm semdangba mapang tangokba noksa nung angur.

**Dimapur, Aenjeti/January 27 (TYO):** Minister, Horticulture, Salhoutuonuo Kruse-i January 27, 2025 nü Atoizu Horticulture Farm semdanga yangji inyaksangshi aser terenlok asadanga liasü.

Lai iba tesem semdangba mapang Dr. Alongba Tzudir, District Horticulture Officer, Zunheboto den region nung horticulture dak sendakba inyakyim balala indang jembia liasü.

Iba mapang la den District Administration, Police aser Horticulture department nungi ketdangsurtem oa liasü.

## Pungro nung SDAO Office building tasen semzük



**Dimapur, Aenjeti/January 27 (TYO):** Sub-Divisional Agriculture Office (SDAO) indang office building tasenba January 27, 2025 nü Pungro Town nung MLA & Advisor, Department of Agriculture, Mhathung Yanthan-i semzükja liasü, kong sorkar ketdangsur aser NGOs tem aden.

Advisor Mhathung Yanthan-i iba sentong nung jembidang department-i office building tasen takok ngua renemba atema tenüngsang

agütsü aser ano nürburtem aser department tsüngta amalitep aliba asoshia pelaba lemsatep aser nürburtem telungjem, tejangraba aser meranga inyakba ajanga teimla tulu ajiteter ta ashi.

Kasa sentong nung Advisor, Home Guards and Civil Defence, Fire and Emergency Services, S. Kiusumew Yimchunger-i o tatsüka jembidang iba mapa asoshi tenüngsang agütsü aser aluyimer nem temlung

agütsütsü tongtipang ta shia liasü.

Pungro Public Front tir Kongsu-ia iba sentong nung jembidang pelaba lemsatep aser iba facility ya ajanga sub-division nung aluyimer yaritsü imlar ta ashi.

Iba sentong nung Rokhwetsholo Kapfo, SDAO Pungro menden liasü aser Akumtoshi, Agriculture Officer, SDAO office, Pungro ajanga melepzüng o jembia sentong tembang.

## Wokha nung Lighthouse School Project atema senden amen

**Dimapur, Aenjeti/January 27 (TYO):** NECTAR Project kübok District Committee for Lighthouse School (DCLS) pur senden ka January 27, 2025 nü Deputy Commissioner, Wokha indang Conference Hall nung mena liasü.

Iba senden ya Deputy Commissioner, Wokha, Vineet Kumar IAS lenisüba kübok amen aser Light House Complex (LCS) yanglutsü aliba atema jembia liasü.

Senden nung Joint Secretary and Deputy Project Director of NEP - NECTAR, Avelü Ruho ajanga iba project indang rateta ashi aser ibai talisa state nung government school tem dangar memenep aliba yaritsü asoshi lir ta ashi.

Ki o jen peria maliba den shisaliok tajung magütsütetba ajanga yimyak yimtsüng nung tanurtem kanga akoksar, shisatsü aser shisaliok tajung monguteter.

Iba Project kübok Government Higher Secondary School Wokha ya center of excellence asütsü shima liasü.

Ruho-iba project nükjidong, mapa kuma inyaksü, kakat reju shimba yimya, DCLS teinyaksü

indang tejangja PowerPoint presentation agüja liasü.

Lai district nung civil society organisation tem dang iba project mapa kuma inyakba mapang koda masü timtem ajurura yaritsü ayongzüka liasü.

Deputy Commissioner, Vineet Kumar-ia iba project dak sendakba nung district administration-i yaritsü mulunga lir ta ashi.

World Bank teyari nung Department of School Education ajanga 'Nagaland Education Project - The Lighthouse - Nagaland Enhancing Classroom Teaching and Resources (NECTAR)' ya Nagaland nung government school tem nung shisaliok tajungtiba nung sayutettsü nükjidong nung tenzükja liasü.

North east nung state sorkari indang indanga mapa kuma inyakba education project World Bank ajanga senotsü teyari agütsüba ibai mezüngbuba alitsü.

NEP - The Lighthouse Project nükjidong ya state education system tashi itshia kaketshir aser tesayur nem maongka tajungba agüja parnok sempet angatetdaksütsü asoshi lir.

# Delhi election atema AAP-i tenangzükba 15 metetdaksü



January 27, 2025 nü New Delhi nung AAP National Convenor, Arvind Kejriwal, Delhi Chief Minister Atishi, taoba mapang Dy. CM Manish Sisodia aser party lenirtemi Delhi Assembly election atema party manifesto sayadang tangokba noksa nung angur.

**New Delhi, Aenjeti/January 27 (Agencies):** Hombarnü AAP tongti lenir, Arvind Kejriwal-i Delhi assembly election atema party manifesto sayaogo.

AAP manifesto nungji tenangzükba 15 lir.

Taruba hopta Delhi nung assembly election agütsü lia Kejriwal aser AAP lenirtemi, 'guarantee' ta asüba olong ya India nung election nung par party-i mezüng 2020 küm amshia liasü, ta metetdaksü.

AAP-i mapa agütsütsü, tetsürtem nem senotsü teyari agütsütsü, Yamuna ayong merüktetsü aser bendanglen azüngtsü janrar SC/ST kaketshirtem nem scholarships agütsütsü nangzük.

Kejriwal-i, tebur kaketshirtema tajangzük angutsü, bus nung angati senzüdaksütsü aser metro nung para shilem 50 ajemtsütsü, ta metetdaksü.

AAP-isa auto aser taxi anishir jalatem kiyimdang sen lakh kaka teyari agütsütsü aser insurance lakh 10 agütsütsü

nangzük. Manifesto sayaba sentong nung jembidang BJP aija Kejriwal-i, BJP-i AAP tenangzükbatem yimsüsüba ajizüker, ta ashi.

"Linük nung onoki mezüng 'guarantee' olong ya amshi. Onoki iba olong amshiba sülen BJP-i auya. Ajisüaka tetsüngdaji ibai lir- onoki guarantees ji ataloktsür saka parnokibo mataloktsür," ta taoba mapang Delhi Chief Minister, Kejriwal-i ashibn.

"Kejriwal ki Guarantee" kübok Delhi nung alirtem atema mapa aika adokdaksütsü, Mahila Samman Yojana kübok tetsürtem nem ita shia sen 2,100 teyari agütsütsü aser Sanjeevani Yojana kübok teintet sensotem nem angati healthcare facilities agütsütsü nangzuka lir.

AAP-isa tzu bills ajemtsütsü, Delhi nung alir kibong shia nem tzu temerük methitemi agütsütsü, Yamuna ayong merüktetsü aser gari lenmang tajung agütsütsü nangzük.

Bendanglen azüngtsü janrar Dalit kaketshirtem nem

senotsü teyari agütsütsü, metro nung tetsür/tebur kaketshirtem para shilem 50 ajemtsütsü, 'Pujari-Granthi Samman Rashi Scheme' tenzüktsü aser tekülem kidang putirtem aser gurudwara granthis nem ita shia sen 18,000 agütsütsü, joko tang nungibo para kidang alirtem nem-a angati tzu aser electricity schemes agütsütsü, ta parnoki nangzük.

AAP-isa sorkar tasen tentetba sülen anogo 15 tsüngda kilentzü aodak mokdanga aliba yanglutsütsü, maneni angati ration agütsütsü, auto aser taxi anishir jalatem kiyimdang sen lakh kaka agütsütsü, auto aser taxi ansishirtem nem sen lakh 10 tashi life insurance coverage agütsütsü, Resident Welfare Associations (RWAs) nem security guards agütsütsü aser CCTV cameras inoktsütsü, ta parnoki nangzük.

Parnokisa, tang aliba angati schemes maneni benoktsü; angati shisaliok, angati tzu, angati electricity, Mohalla Clinics aser bus nung tetsürtem angati senzüdaksütsü, ta nangzük.

# JPC-i onük 14 yanglushir Waqf Amendment Bill agizükogo

**New Delhi, January 27 (Agencies):** Hombarnü Joint Parliamentary Committee (JPC)-i Waqf Amendment Bill nung onük 14 melenshir iba Bill agizükogo.

Iba Bill ya yaküm tzüngluruwa mongpu Parliament nung Lok Sabha senden nung benoka liasü.

Opposition MP temi

temetongshitsü onük 44 benoka liasü, ajisüaka BJP MP, Jagadambika Pal-i aniba Joint Parliamentary Committee-i magizük.

JPC nung opposition nungi züngsemtemi, "Iba ya taila inyakyim ka liasü. Onok tebilemba mangadang. Pal-i pa kija tashi amshi," ta ashi.

JPC nung Chairman,

Jagadembika Pal-i, Bill indang Arrlatem nung NDA züngsemtemi metongshiba onük 14 ji agizükogo, ta ashi.

Arrla 44 prongla nung opposition züngsemtemi temetongshitsü noklang aika benoka liasü, ajisüaka vote agütsütepa item ajakji magizük, ta Pal-i metetdaksü.

# China Foreign Minister Wang aser Foreign Secy Misri na senden amen

**New Delhi, January 27 (Agencies):** Hombarnü India Foreign Secretary, Vikram Misri-i China Foreign Minister, Wang Yi den senden mena linük ana tesendaktep onüktem nung o lemtepogo, ta ketdangsertemi metetdaksü.

India aser China na tsüngda tesendaktep tajungba akümtsü nükjidong nung China ketdangsertem ajurua jembitsü asoshi Misri-i anogo ananü China semdang.

Wang ya Foreign Minister dang masü saka Communist Party nunga tongti züngsem ka lir aser India aser China tsüngda arrtsü dak sendakba nung inyaksangshitsü atema shimtetba Special Representative lir.

India nungia Special Representative ji National Security Advisor, Ajit Doval lir.

Taoba ita Wang aser Doval na ajurua senden amenba sülen tang Misri-i China semdang.

Misri den senden amendang Wang-i, yaküm Russia nung China Tir Xi Jinping aser Ato kilonser Narendra Modi na

senden amenba sülen linük anati tongtibang telemtetba aika agiogo, level balala nung senden menogo aser China-India tesendaktep tajungba akümtsü atema aika inyaksangshio, ta ashi.

Wang-isa, linük anapronglai iba maongka agitsüla, lenmang tom nung ajuruteptsüla, telemtetba tajung agitsü atema lenmang bushitsüla, kati ka angatetsüla aser nungitetsüla aser temelung melemtep malitsüla, ta ashi.

Asia aser alima nung tesünep, terenlok aser azükaru alitsü atema India aser China tsüngda tesendaktep junga alitsüji kanga tongtibang, ta Wang-i ashi.

Amongnü Misri China tonga aoba sülen pai Communist Party indang International Department nung tongti, Liu Jianchao ajurua liasü.

Misri ya taoba mapang Ambassador to China liasü.

January 29 nungi China nung Spring Festival aser Chinese New Year amongtsü lia Misri-i China semdang.

# Ganga nung tzu chigoba agi sensak tia magientsü: Mallikarjun Kharge



**New Delhi, January 27 (Agencies):** Union home minister, Amit Shah-i Maha Kumbh nung shilem agiba aija Hombarnü Congress Tir Mallikarjun Kharge-i, Shah-i Ganga ayong nung tzu chigoba agi sensak tia magientsü, ta ashi.

Congress lenirisa, BJP lenirtemi noksa tangoktsü atema Ganga ayong nung tzu chigotsü tokteper, ta aitsü.

Kharge-i, "Ganga ayong nung tzu chigoba agi sensak tia anener asü? Ibaji ajanga tebok asünger asü? Ni kar tamang jenjang ashishir masü. Nisung kari ashishira ni tatok meshir. Ajisüaka kü dang shing- tanur ka yaseta asüadang, tanurtem school-i meyokdang, aayangertemi taa mangudang item nisungtembo sen meyrjang aika indoker aser ayong nung tzu chigotsü atema tokteper," ta metetdaksü.

Rajya Sabha nung opposition lenir Kharge-isa, BJP-RSS nisungtem ya linük ashioksürtem lir, yimsü nung ajemdaker sensakertem takoksa ngudaksüba ya Congress-i kodanga magizükttetsü, ta ashi.

Ato kilonser Modi aser Shah na aija Kharge-i, "Parnoki temenen aika menaogo, anungji taküm 100 ben ali nunga parnok kodaki maotsü," ta ashi. Kharge-i jembiba o aija Puri

nungi Lok Sabha nung BJP MP, Sambit Patra-i, Congress Tiri jembiba oji Hindu nung crore aika tamangertem anema jembiba o lir, ta ashi.

"Alima ajaki Mahakumbh indang jembiba mapang nung India nung Opposition party tulubai ibaji anema jembir. Congress Tir Mallikarjun Kharge-i Mahakumbh indang jembiba oji ajanga nisung crore aika melung yirutsür. 'Ganga ayong nung tzu chigoba agi sensak tia anener asü? Ibaji ajanga mapa angutsü asü?' ta pai jembio. Mallikarjun Kharge, Congress party, Rahul Gandhi aser Sonia Gandhi nungeri tanga yimsü ka atema kasa oji jembitettsü asü? Sanatan Dharm anema iba ama o jembibaji taaktsüka lir," ta Sambit Patra-i ashi.

Paisa, "Rahul Gandhi aser Sonia Gandhi nati Sanatan Dharma dak amangertem ajak aser linük nübur ajak dang tatok meshitsüla," ta ashi.

Madhya Pradesh kübok Mhow nung "Jai Babu, Jai Bhim, Jai Samvidhan" rally nung jembidang Kharge-isa, "RSS-BJP ya linük ashioksürtem lir. Sensak tia aser mapa manguba tebilemtsü nungi kümzükünura linük temzüng kümzükang aser longjema liang," ta jembia liasü.



January 27, 2025 nü New Delhi nung Rashtrapati Bhavan kima Tir Droupadi Mumru, Indonesia Tir Prabowo Subianto, Ato kilonser Narendra Modi aser tatong Tir Jagdeep Dhankhar nung tangokba noksa nung angur.



## TIR YIMYIM YIMOBILEM (EDITORIAL)

DIMAPUR SANGTENNÜ, JANUARY (AENJETI) 28, 2025

### Naga nunger ochimashiba ya !

**K**hen mapang ka Tiyazübai Ochiba indang tula süoshi ajak bener ajenba to Nagaland nung jenokdaksüba amato tiyazübai ochi tula semer senzüba agi Nagaland nung tejembibo ajaki ochishia alitsü indang jembir saka mapa agibo shingaia ochi inyaka mesayur ta ochimashi tera-tera inyaka tenzükba nungi, tangbo kidangi ut adokdaksü ama, asen lima nung asenoki jakdaka ochimashi mapatem inyakba agi masem kümogo. Aji oda, government nung ochimashi mapatem inyakbatem ya asenok asoshi taoksatsü osang tasen ka masü aser kasaji arogo nung ochimashi mapatem atalokba yaa asenok sobaliba amato ka dang lir saka tang Nagaland nung Chozuba aser Phek na tsüngda gari lenmang ulushia 2 lane küma yanglutsü asoshi sentong yanglua angashiba agi jet ta alimenok, compensation, meshitsü atema lenmang songa ki yangluyonga aoba mapa yabo kenyongi Naga nunger Khristan purtem aser talisa Chakhesang nunger ama dak nungibo meimlaba jakla aser mapa ka sayur asütsü. Atangji, iba ama jakla tamajung ya parnoka kar dang nungi angazüka beshir asü mesüra parnoksa apiteta inyakar ashitsü makok, saka iba ama ochimashiba mapa ya dena, tanga lima nungi tenzüksü masüji, asen lima, Samanirtem lima, nungisa tenzükba otsü lir. Joko, asenok ya mapa meinyak ser sen agizüka achir kin amato kümadok nungji, asenoki mapa inyaker anguba sen yabo taila sen amato bilemer aser tenüka masünger, anungji asenok tazünger - mazünger aser lanur- tain ajunga mapa meinyak ser sen achitsüba lenmang bushirtem küma omaogo. Aji oda, Nagaland nung government mapa bushirtem yaa mapa inyaker ita sen angutsüba mapa masü saka mapa meinyak ser ita sen chia alitsü tejangraba nung government mapa bushir. Alima tsüngdang Nagaland noksaji ibaji lir. Atangji, Naga nungertems süaka, alima yimya asünungji, kar ochi mashiba aser kar ochi tashiba, kar tongmelang saka karbo tebenja aser tekülak. Item jaklatem rongnungji asenoka koba asütsü ? Aji oda, Naga nungertem rongnunga, ni reprangtetba aser angatetba nungbo, Chakhesang nungertem ya tongmelangba aser ochi tashiba kin ka lir. Ajisüaka, parnokia dena sen angutsü mechi yamaji alima dang jakla tamajung sayua inyakra, Nagaland nungbo tema nung ochishiba indang süoshi semer arusang Tiyazübai kin ajak madak takok angur asütsü. Aji oda, ochi nung Chakhesang kin ama kati menokdaktetra, tanga Naga kin asoshibo ochi anasaia moutettsü. Tanü Nagaland asoshi tebilemstü tulutibaji sen makaba tebilemstü masü aser yimten tebilemstü mekoktetba tebilemstüa masü saka ochi meshitetba tebilemstü ya lir. Asenok dak ochi mali tashibo asen lima nung garia, train-a aser tayimtsü-a junga manentettsü aser Naga yimten tebilemstü yagia tebilemstüang aika kümadoktsü. Joko, asenoki asenoksasa takoksa aser timtem arema ochi dangi meyiptsüla. Atangji, ochi agibo asenok yakta takar makümstü aser mapa meinyak ser senjang kata magütsütsü. Ajisüaka, tiyazübai asenok manger-sangwa nung takar kümdaktsüba aser mapa meinyaki rongsen moatsüba ajakji tiyazü aser taila temoatsü asütsü, aji pongmang nung shi den chiyonga pongmang amai dang lir, saakerbo meinyakra etsük ontsü den chiyongtsüa mangutsü. Aji oda, tiyazübai asenok koma karaa kadaktsü yamaji karaa sensak tiiai idaktsütsü. Joko, Nagaland nung asenoki anir Tiyazüba dang nungi ochi süoshi to rakzüka bener Ochiba bushia odi aser kechi tensa ajurudir ajuruaka, Nagaland yanglushitsü asoshi ochi nung nokdakdi. Tiyazü nisung tenüng nung sen agizüka agiba mapa, mapa meinyak ser sen agizüka agiba sobaliba, sen angutsü mechi tiyazü ki yangluba mapatemji shisa takar mapatem masü. Tiyazü agi akaba aser tiyazü agi takok angubatemi chirnurtem asoshia temoatsü senmang küma maotsü, item temoatsü mesükba tiyazü aser taila rongsentem jagi chirnurtem taküm-ang raksatsütsü. Joko, asenokbo lenmang (chance) dang lira auyatsü ta bilema inyakba shisatsü to endokdi aser auyatsü lenmang sademsadema aliyonga mauyatsü purtem kümdi. Iba tangatetba shisatsü aser ochi mapa agi dang Nagaland topur junga yanglutettsü.

## OLEMSABANG

### SAN ASER NABONG SADANGBA MAPANG ASÜ?

- Süpongñüsang Longkümer, Darogapathar Dimapur

Alima ajaklen meimchir lipaliro reprangtangra, aser angatangra tashi temetet nüpur saka mashi memetetter ten kecha palaka mali, cü aser natzü meyoktep ama tang temulung alemtsü mali kümaogo. Los Angel nüpurtemi-a Tsüngrem mali ta shitetba yagi nisung rongnung kar palaka tematiba mali ta metetdaksür. Kechaser ni ama mashimaluba kadi-a Tsüngrem mali ta ashitsü makoker. kechaser Tsüngrem ali agi yangluba nisung taküm nung Pa meyong tangu apuoktsüba ajanga taküm alir, aser nisungi yangluba ki nung nisung alir anungji tiyanglur ka aliba ajanga iba telong nung alir aser kibur akümer. Aseni amangba agi tang masü saka mamangaka kibur ka aliba ajanga tang nisungi meyanglutetba lendong agi tashi temetetter lima aser citytem raksatsür. Anungji khristar arogo ya tematiba, ibai nisungi ajayangtsür tang ashe Khrista Yisu dak amenlokba arogo nisung meyong masü. Pa tenzükertemi Iba arogo metsüpu nung, alima yimsüsübaji Tsüngremi latettsübasa asüyongbo idakji tamangba aisü nungi longjemer nokdakba yimden, anungji yimsüsürtemi koda tsüpula; Artsü adena kodanga marutettsüpur nem bei chubatsü asoshi rongsen agi alangzüker bei lima sensak tiya nung lir. Iyongji asenok takitsü maka aser bei lima merenloker. Au asü nonga iba pukümerji shirnok? Bei lima memeimertem. Laishir telok YSS purtemi mapa tajung inyaksü pangjempa aipen angashir aji kanga tajung, saka yimden aser subaliba nung maipelentsü kanga kümtangtsüla ta angatetter. kiyimba benjong (Sadi benjong) ibai Tsüngremer temeshi benjong anungji arogo tateshitsü nung kiyimlaji arogo kiyimsang (Tsüngrem) dak aniloktsütsü atema kiyimlaji (Amangpabur) tepoi anir tekülemdaki air aser kiyimsang dak aniloka yutsür. saka kiyimla tepoji arogo nung tenüng maliba nisung ka süra aji arogo nung shilem akitsü metemsü ama ajitetter. yamaji iba dang nungi tamajungba aika sendaka lir.

Anungji yimden aser kin kidong dak sendakba nung Laishirtem maipelentsü kanga kümtangtsüla ta ajungshir. Taoba mapang arogo tambortemi air asangur ani asünger külen Ita asem kechiba adakzüka yutsü? Parnokji aipelena ali asü mali Deacon temi mepushir, saka aipelena lira Ita asem nungpo la temang jagi sayur. Anungji Iba amaji aika sadi makitet ajurua arugo. kiyimertem iba temzüngjagi kümzüka aru. Tawa tanüpo aipelenbaji par mapa sang arogo mapabo tema dokdi ta inyaker, anungji kiyimertem kümtanger asü mekümtangerar iba nungji arogo mejenbotsü kechiyong temzüngji mangatet sayur. Yosefi Maryla temang mazüngba metetta baladoknü aji Tsüngremi maitsü saka pa nem angatetdaksü. Nazaret nunger saka parnok yimtiji Bethlehem asünung tenüng zülutsü ao, idangji medendonga Yisu asutsü mapang adong nungji kanga timtema tenüng zülua yutsür bei yimdakisa meyipba ao, anungji tanü tashi Bethel yim nung Yisu khrista asu aji zülua lir ta ken tenjen atenür, saka Ao arogo amenokba otsü agi iba ken ya akitsü makitsü? Laishirtem amangpabur ajak nenoki tajungleni anitsü yimlaseta anidaker ako. Asenok ya Tsüngrem masü saka tazüngpa yari karbo lenmang palala nung tematiba jenjang nung mena sadi aser kuli-a shidak akizüka alitsü, saka taküm kaket nung tenüng melira koda tesusatsü asütsü anungji shingaia mashishitsüsa lenmang shidak nung jaja tajungba ta ayongzüker. Laishiba ashir, mapa medene tamang tasü, Tsüngrem ou tajung kanga temulung süloka jambir anungji donga maruripo kechi yamai ajung ta pelar saka mapa mejungra anasa alirtembo nü taküm apayua repranga alitsü anungji mapa tajung Tsüngrem pelatsüsa inyaksü merangteppang. Government mapa inyakerkem dak temulung rongsa jembir saka arogo nung ouchi laodaktsüra molumi-ipo külemi aitsü itangji Santemi kanga apayua reprangtsüsa ataloktsü. Laishiba azüng dang ouren ajak angatetta azüngtsü Tsüngrem tang sarasatema teratettsü meshitsüla. Tsüngrem ou azüngtsü tamang melira züngaka mangatettsü aser meratettsü, Laishirtem-a Theology azüngba jagi teperi masü iyongji aipelenür. Tekülemi arurtem tanüla nung jangraseta arua külemba nung tanüla tzü inlokaktsütsü yongyaseta atar saka Tsüngrem ou jembirji tarak aketba Sanüker süra tanüla atsüa arutsü makoker, Tsüngremi mamshir anungji iba ama tenzükertem ani süngzüka ali tajungba. Outsü tatongi masü nüngdakba oulong kar agi lemsatepber.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Nicaragua nung Evangelical Arogotem anema inyaker: ECU



Nicaragua Tir, Daniel Ortega noksa nung angur.

**Caracas (Venezuela), January 27 (Agencies):** Tesüiba küm ana tsüngda Nicaragua nung Khristantem anema inyakba tatalokba aika lir; talisa sorkari Evangelical Arogotem anema inyaker, ta France nung amenoka aliba European Centre for Law and Justice (ECLJ)-i metetdaksü.

2018 küm nungi tenzuka Nicaragua Tir, Daniel Ortega-i Khristantem anema inyaker.

ECLJ-i report ka ajanga, "Tesüiba küm ishika tsüngda Catholic Arogo anema inyakba sülen tang Evangelical Arogo aser tanga denominations anema inyakba-a kanga bulua kümogo," ta metetdaksü.

ECLJ-i "The Persecution of Christians in Nicaragua 2018-2024," report ya tan ita tetenzüklen sangdonga liasü.

Tesüiba küm ana tsüngda iba linük nung evangelical tentetem anema inyakba tatalokba 100 dak

tali lir; ajisüaka iba dang nungjagi teimba alitsüa akok, kechiyong karibo tetsübu nung item ama osang melemsateper, ta report nungji shia lir.

Nicaragua linük temzüng nungbo tamangba yimsü temeden akhümtsübutüsü lateta lir, ajisüaka Nicaragua-i Khristantem reshikangshir, ta report nung shia lir.

Iba linük nung Protestant, Catholic aser tanga Arogotem aika anentsüogo aser Khristan charity organization-a aika anentsüogo.

2023 küm May ita nung Asociación Misión Cristiana Verbo Divino-a anenja liasü. Küm 30 dak tali iba Association yagi Arogo 27 repranga liasü aser Casa Bernabé orphanage densema project aika tenzuka liasü.

Yaküm January ita nunga sorkari Asociación Misión Pentecostés Jehovah Proveerá,

Asociación Misión Apostólica Evangelística y Profética, Fundación Iglesia Familiar Nueva Restauración aser Asociación Misiones Trasmundiales de Nicaragua densema Khristan tentet aika anenja liasü.

2023 küm December ita nung Puerta de la Montaña (Mountain Gateway) Church, Asociación Ministerio Internacional Berea (Pentecostal) aser Asociación Ministerio Internacional Creciendo en Gracia anentsü. Yaküm August 29 nü Association of Missionaries in Nicaragua aser Nicaraguan Evangelical Alliance anenja liasü.

Ano Evangelical organizations-Christian Aid aser Compassion International den Catholic Agency for Overseas Development (CAFOD) aser Caritas International-a anentsüogo.

"Tesüiba küm ana tashi Arogotemi yimsü dak sendakba sentongtem magiteter. Hopta shia tekülem sentong asemben agia liasü, ajisüaka tangbo Amongnü dang minute 45 tekülem sentong agitsü melar," ta report nung shia lir.

2018 küm Nicaragua nung nüburtemi loktiliba nung temelenshi atema longkak aitba mapang nung Catholic Arogoia longkak aiteritem yari. Iba mapang nungjagi tenzuka Tir, Ortega-i Arogo anema inyaker tenzük.

## ANOGO ABEN TSÜNGREM DEN

### Tasen aser temelenshi

*Pei teyanglur mesükba amato tabensa shisatsü dangi tasenba küma yanglua lir, Pa sobuogo. Kolosi 3: 10.*

Tabensa aser tasen jagi Khristantem indang rasa-a ashir. Pauli tejen yimya mapa kar indang jembi : nüktapangta, memerükba, tamajung jangraba, ain adokba, tenükmerem, aser tangar mezüngmeshiba. Item o tem yagi nisüng ajak dak temenen yimya aliba sayur. Saka tesülen Pauli yimya tasen kar sayu: Aria bilemba, temeim, ajemalu, taremsük aser teputeper. Ibaji kanga tabensa lir! Shitakba nung ibai terenlok akaba dang nungi tali; ibai Tanela Temeshi ajanga asenok Khrista mesüka kümdaktsüba lir.

Mapang shia asenoki pei takümüji meyipa repringshitsüla aser koba yimya keta lir asüngdangtsüla; tejen - mesüra tasen. Asen jakla ain adokba, taremsük makaba, merumeru, tenük merem agi ratettsür asü? Mesüra anükalem, temeim agi ratettsür? "Nenok ajak shirnok Khrista nung baptia lir nenok sasa Khrista sobuogo" (Galatia 3: 27). Khristan takümüji asen koba tejenba yimya nung aso aji endoker tasenba sobutsü asoshi teti raraba taküm lir. Asen mulungjang nung Tanela Temeshi ain ajanga Tsüngremi asenok tasen aser tabensa kümdaktsür.

## North Korea mission asalentong melentsü nüngdak: Rev. Stephen Kim

**January 27, 2025:** January 23, 2025 nü South Korea yimtiba, Seoul nung aliba Franciscan Education Centre nung Data Base Center for North Korean Human Rights (NKDB)-i North Korea indang '2024 White Paper on Religious Freedom' sangdongba den külemi North Korea nung meimchir temeden dak sendakba awareness survey ka metetdaksü.

Jericho Mission nungi Rev. Stephen Kim-i tesüiba küm 30 tashi North Korea nung meimchir temeden aser yimsü temeden tajungba akümtsü atema inyaka aruba den külemi North Korea nungi jena arurtem yaria arudar.

Rev. Stephen Kim-isa North Korea nung tang mission mapa dak sendakba osang lemsateper.

North Korea nungi jena arur South Korea nung jenoka alirtem dang asüngdangyaba nung ajemdaker 'White Paper on Religious Freedom' renema liasü. Iba report nung North Korea nungi jena arurtem dang nungi telangzüba anguba 15,169 aser yimsü nung ajemdaker reshikangshiba tatalokba 2,045 densema lir.

NKDB nungi researcher, Soo-young Yang-i item osang metetdakja liasü.

Iba survey ajanga bushitetba

agi, telangzüba agütsür shilem 96.6-ibo North Korea nung yimsü dak sendakba kecha memeler, ta ashi.

Iba survey nung shilem agir shilem 4.7-i dang mimshia süaka North Korea nung yimsü dak sendakba benshiba parnoki kuli süa nguogo, ta ashi.

North Korea nung underground Khristan Arogotem dang masü saka tanga yimsü amangertema lir.

North Korea nung nenoki Laishiba ngudanger asü? ta parnok dang asüngdanga liasü. Parnok shilem 5-i dang Laishiba nguogo, ta ashi.

Yimsü dak sendakba nung reshikangshiba shilem 64.1 liasü aser Laishiba densema yimsü dak sendakba osettsüset aliba atema reshikangshiba shilem 17.9 liasü.

Soo-young Yang-isa alima linüktem dang North Korea nung meimchir temeden aser yimsü dak sendakba nung reshikangshiba na tsüngda tesendakteper aliba atema o lemteptsü nüngdak, ta metetdaksü. Iba dak alia yimsü dak sendakba kakettem North Korea-i yoktsü atema telemtetba kar agia inyaktsüla, ta lai ashi.

North Korea nung mission asalentong melentsü nüngdak, ta shia Rev. Kim-i, "North Korea

nung Khristan yimsü samatsütsü atema inyakba puti otsü repringdangra, coronavirus jakdang aser iba sülen temelenshi ka liasü. Iba wara mapang nung North Korea-i ajak azüok aser arrtsülen nisung süaka shiruru süaka ajak khasettsü tetuyuba agüja liasü," ta ashi.

Rev. Kim-isa, tang China nung North Korea nungi jena arurtem parnok 40,000 shi lir. North Korea nungi jena arurtem dak sendakba nung China inyakyim melenshiogo," ta ashi.

"China nung nütsüng ajema akümba den külemi China-i North Korea nungi jena arurtem South Korea-i meyoker. South Korea-i jena aotsü merangertem nem temerenshi tesashiba agütsür. North Korea nungi jena arur karbo China nung küm 15 dak tali lidar. Ano South Korea nung missionary 57 bo kangshia China-i anir ogo," ta Kim-i metetdaksü.

North Korea nung underground Arogo dak sendakba nung Kim-i, "Video aser noksa balala ajanga North Korea nung underground Arogotem mali ta ashir, ajisüaka ni North Korea nung Khrista dak amangertem ajuruogo. Osang tejangja bushiba nung

ajemdaker North Korea missions atema asalentong yanglutettsü akok. Tensa kanga mejungi liaka North Korea nung tang tashi Khristantem lir," ta metetdaksü.

North Korean Human Rights Archives Director, Yeosang Yoon-i, Arogo tangatetba nungi ajemdaker North Korea nung meimchirtem temeden jenjang tajungba akümtsü atema asenoki inyaktettsü, ta metetdaksü.

Yoon-i, "Korean Arogoi mission koba tesemi yoktsü?, Arogo kwi amenoktsü?, senotsü aser mapang kwi nüngdaksü? ta asalentong yanglua sarasademer. Tang nisungtem reshikangshir, concentration camps nung puoker mesüra yimjak nung tepseter," ta ashi.

Rev Kim-i, "Tang North Korea nung Khristan nütsüng ishika dang lir. North Korea mission atema tamendakdak yanglutsüla aser asalentong yanglua inyaktsüla. Iba dak alia North Korea nungi jena arua China nung alirtem atema inyaktsüla," ta ashi.

Researcher Yang-i, "North Korea den tongtepratepa jembitsü atema lenmang bushitsüla. Iba atemaji Switzerland aser Sweden ama linüktem den senteper inyaktsüla. North Korea nung

mapang talangka pua ayuba missionary tem lir. Tang parnok taküm lir asü maliar mejangja; asenoki ibaji jangjatsü merangtsüla," ta ashi.

United States Commission on International Religious Freedom (USCIRF)-ia report ka ajanga Khristantem reshikangshiba tsütsü China-i North Korea linük yarir, ta metetdakja liasü.

USCIRF sangdong ajanga, "China nung jenoka aliba North Korea nung refugees tanaben North Korea-i yoktsü atema China sorkari maneni North Korea den yariteper. North Korea-i tanaben yokra parnok reshikangshitsü mesüra temerenshi tulu angutsü, ta metetsümonga Khristantem aser Khristan missionary tem den tongtepratepa alir Khristantem aika North Korea-i meyipa yoker," ta metetdaksü.

North Korea-i Khristantem ya linük anemertem aser ashioktsürtem ama züngshir, aser ibaji yimtenren anema inyakba ta züngshia tepsettsü langa lir ta züngshir. North Korea nung nisung ka ket nung Laishiba aliba, yimsü kar amangra mesüra Khristan ka süra reshikangshitsü akok, kangshia mapa tasak inyakdaksütsü, tepuokdak ayutsü mesüra tepseta indoktsü akok, ta USCIRF-i metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tebushitetba

(adv) bushir anguba, tengutetba (finding)

\*Arogo indang tebushitetba kar tenzükertemi bener aru.

Tebuti

(n) kibong nung obala ( father, head in a family)

\* Kidang tebuti melira akhüm maketer.



Tir Yimyim

OLONG PAITEP # 7048

Grid for OLONG PAITEP # 7048 with numbers 1-17 in various cells.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7047 TELANGZÜBA

TIPIEN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Amity University Maharashtra, Mumbai ajanga Guinness World Record ka yanglutetogo. University campus nung telok 23 nungi nisung 399-i advertisement production atema intensive session ka nung aden aser iba sülen kaketshirtemi pei pei advertisement films yanglua liasü. Guinness World Records nungi Senior Adjudicator Swapnil Dangarikar-i iba atema kulikaket agütsü. Iba sentong nung stewards 16 aser official witnesses asem- Dr. Vinod Indurkar, Dr. Ambrish Saxena, o Santosh Thundiylil nunger aden.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Harmeet Singh-i Assam nung interim DGP inyaka atatsü



Guwahati, January 27, 2025 (Agencies): Assam nung Director General of Police (DGP), Gyanendra Pratap Singh nem mapa nungi sodi agütsü aser Central Reserve Police Force (CRPF) nung Director General (DG level) inyaksü lenzüksüogo.

Ministry of Home Affairs-i tetuyuba agütsüba sülen January 18, 2025 nü Appointments Committee of the Cabinet ajanga GP Singh

mapa tasen nung shimba mulunga agizük. Singh-i CRPF nung deputation nung Pay Matrix indang Level-16 kübok tenzüksü aser November 30, 2027 nü pa mapa anisüngzük angutsü.

Harmeet Singh-i Assam DGP indang mapa repsema inyaka atatsü.

Harmeet-i tang Special DGP of Headquarters and Border, Director General of Civil Defence, Commandant General

of Home Guards, aser Director of Fire and Emergency Services inyaker.

1991-batch Assam-Meghalaya cadre IPS officer G. P. Singh-i February 1, 2023 nungi Assam nung Director General of Police inyaka aru.

"Ketdangsür mapa tasen agizükba sülen mapa nungi anentsür" ta Home and Political Commissioner & Secretary, Biswajit Pegu-i sangdong ka nung ashi.

Bajali police-i Rs 2.98 crore alang drugs rakxaa endok

Guwahati, January 27, 2025 (Agencies): Hombarnü police-i Bajali nung Rs 2.98 crore alang drugs rakxaa endokogo.

Tesüiba küm 2 tsüngda tatalokba balala nung drugs apuba raksa endok ta

additional superintendent of police (ASP) Trinayan Bhuyan-i ashi.

Bajali police-i Rs 23, 65,400 alang Heroin gram 118.27, Rs 1,65,02,000 alang Brown Sugar 825.10 gram, Rs 28, 82,100 alang Ganja seret 57.642, Rs

69, 93,000 alang Codeine Based Cough Syrup 9990 bottles aser Rs 10, 81,000 alang Psychotropic Tablets 2162 numbers rakxaa endok.

Bajali district nung Pahumara river anasa drugs rakxaa endoka liasü.

Bloomverse Music Festival slot atema metetdaksü



Shillong, January 27, 2025 (Agencies): Artist development aser music distribution platform TuneCore-i tang agi tanaben atema Bloomverse Music Festival den yariteper.

Bloomverse ya Skillbox

ajanga ayongba boutique music festival lir aser northeast nungi artist temi shilem agir. Tesüiba mapang iba benjung nung The Midnight, Anuv Jain, Lifafa, Lucid Recess, Digital Suicide amala teloktemi shilem agiogo.

GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA

NO. ED/EST/B-1/2019

Kohima, dated the January 2025

NOTIFICATION

In pursuance of advertisements No. ED/EST/B-1/2019 dated 09.11.2023 and 11.11.2024 for recruitment to the post of Drivers under the Department of School Education, the date for the Written Test has been fixed on 05.02.2025.

Therefore, all the applicants are requested to collect the Admission Slips on 3rd & 4th February 2025 from Room No. 512, Directorate of School Education. Further, the applicants are also requested to submit two recent passport size photos at the time of collection of the Admission Slip.

(THAVASELAN. K) IAS
Principal Director.

OFFICE OF THE  
**MERANGKONG SENSO JAMIR KIDONG TELONGJEM**  
Merangkong, Pin – 798618  
Dist. Mokokchung : Nagaland

**TENÜNGSANG AGÜTSÜR**

Merangkong Senso Jamir Kidong Telongjem mendenti ajanga Wb. O. Imliwati S/o. Lt. Olemtuba Jamir aser Narotosula ajanga Nagaland sorkar mapa Department of Directorate, Treasuries & Accounts nung Director menden tongteta kidong aser yimer yimsanger nem konang nungsang aser temoatsü tulu bener arutsü nung kidong mendenti ajanga tenüngsang aser tetushi tulu agütsür.

Maneni sorkar aser nübör tenzüksü asoshi tulusang Tsüngremi pa aser par kibong arishi talang moajang ta sarasademtsür.

Sd/- M. Jongpongyanger President  
Sd/- Tiawapang General Secretary

Office of the  
**Longjang Senso Mungdang**  
**METETDAKTSÜR**

60 Buba Longjang Senso Inti Mungdang 31 January 2025, 9:00 Am nungi Community Hall Longjang nung amongtsü.

Anungji Longjang Senso ajak iba Mungdang nung atentsü office ajanga metetdaksür.

Sd/- M. Temjen Jamir President  
Sd/- T. Imli Pongen Secretary

**PUBLIC NOTICE**

**ICICI Bank** Registered Office: ICICI Bank Tower, Near Chakli Circle, Old Padra Road, Vadodara- 390 007  
Corporate Office: ICICI Bank Towers, Bandra-Kurla Complex Mumbai 400051.

**GOLD E-AUCTION CUM INVITATION NOTICE**

Tsünglangen shia aliba sen apua alir dang ICICI Bank Limited ("ICICI Bank") nungi gold ornaments melen sen apua lia menoktsü aiben metetdakja arur. Ajsüaka parnoki sen memonoktet nung onoki February 7, 2025 nü züngzüktepa aliba gold ornaments ya E-Auction asütsüsa akumer.

Jelia osang magütsü E-Auction anogo melentsü/account agentsü ICICI Bank dak tashi lir. Auction ya online -https://jewel-auction.procuretiger.com nung nikongdang 12:30 nungi 3:30 ako tsüngla agütsü. Terms and conditions tejanga atema agüja aliba website nung angütsü. Sen apua alir ya sür lira, conditions ajak senmanger dangi aotsü.

Loan A/C No.	Customer Name
Branch Name: Dimapur	
047605001171	Abhijit Sengupta

Date : 28.01.2025  
Place : Dimapur  
S/d Authorised Officer For ICICI Bank Limited

**Impur Bible Seminary**  
Affiliated to Senate of Serampore College[University]  
P.O. Impur – 798615  
Mokokchung: Nagaland  
E-mail: ibsimpur@gmail.com

Ref.No: AB09A01/2025-1  
January 28, 2025

**ADVERTISEMENT FOR THE ACADEMIC YEAR (JUNE 2025-APRIL2026)**

**Impur Bible Seminary nung teküboklen aguja alibatem azüngtsü akok:**

1. Ao oshi agi küm 3 Diploma in Theological Studies (DIP.Ts.)
2. Bachelor of Theology (B.Th) küm 3 (English Medium) affiliated to Senate of Serampore University.

**Nüngdakbatem:**  
**Diploma in Theological Studies(Dip.Ts):** Tanaben asoba Khristan aser Tsüngrem tenzüksü bendanga agutsüba. Azüngtsü asoshi tekupoktiba tasazük Class 8 ajangeter alirtem.

**Bachelor of Theology (B.Th):** Tanaben asoba Khristan aser Tsüngrem tenzüksü bendanga agütsüba. Higher Secondary School Leaving Certificate (HSSLC) or 10+Govt.Education Dept.-i recognize sür aliba nungi küm ana Diploma agir alirtem.

**Tongtepratepsü atema :**  
Impur Bible Seminary  
Mokokchung, Nagaland  
Phone: [7085896263 / 9856860097]  
Email: ibsimpur@gmail.com

Sd/- Principal  
Impur Bible Seminary

**ALI TAYOKTSÜ LIR**

1. Old Showuba nung, 12397 Sq.ft. Four lane, fly over anasa.
2. Rs. 50 per Sqft. Aginüba tasazük angütsü.
3. (5 Pura) 1 Pura - 3,200,000/-  
Contact : 9863826159.

**Tsükoker aliba Jeju Air tayimtsü gol nung ozü tezüng ngutet Seoul, Aenjeti/January 27**

**(Agencies):** South Korea nung December ita tsükoka nisung 179 asüba passenger plane ka nung ozü agi atsükba kuli ngutetogo, ta bushisüngdangger temi ashir.

Jeju Air tayimtsü indang gol anaprong nung aliba ozü tezüng aser azü ya Baikol teal indang lir, koba migratory duck tabu ka lir aser telok tulu külemi yima

senzür, ta Hombarnü sayaba preliminary investigation report ajanga ashi.

South Korea linük nung tayimtsü lendong tulutiba indang bushisüngdangba ya tangbo ozü agi atsükba aser runway tatem nung concrete structure inoka aliba nung rangloksü, kong tayimtsü ya oa atsük.

(Maneni tapak 8 nung...)

# Palestine nunger north Gaza-i meyipa shilanger

**Gaza City, Aenjeti/January 27 (Agencies):** Kin ajunga samatsütsü meranga ita 15 raraba sülen Israel aser Hamas tsüngta ceasefire tezüngzüktep nung shilem ka ama Palestine nunger meyirijang sa meyirijang north Gaza-i meyipa shilanger.

Hombarnep Palestine nungertem telong tenteter sülep aser plastic bags nung pei oset bener tetsüng agi Netzarim Corridor ajanga north tsütsü ao tenzü.

Hombarnep Israel mitkari Palestine nungertem anepdang 7:00 ako nungi tenzüka tetsüng agi al-Rashid Street ajangdaksütsü aser anepdang 9:00 ako nungi tenzüka gari nung Salah al-Din Street ajangdaksütsü ta shia liasü.

Hamas-i nübörtem meyipa shilangba ya Palestine nunger asoshi takok ka lir ta ashir, aser par den sendaktepa aliba Palestinian Islamic Jihad-i ozü nübörtem tesem balala nung prokshidaksütsü bongmanga alir ajunga asoshi ibai telangzüba lir, ta ashi.

Palestine nungertem tashiyim amshia arishir aliba tesem temi meyipa shilangba ajanga parnok pei li nung

sendaktepa aliba jangjar aser ano maneni "occupation" temi tashiyim amshia nübörtem arishitsü nükjidong tesashi aliba nung tamakok ajuruba kuli sayur, ta Hamas-i sangdong ka nung ashi.

Rara tetenzüklen Israel-i alilen nungi amaktsü renemtsü asoshi Gaza north len nungi tashiyim amshia nisung 1.1 million aridoka liasü.

Deobarnü Palestine nunger civilian tem Netzarim Crossing leni aruba Israel sepaitemi nokdanga telok nung injang khalokja Palestine nunger ana tepset, ta medical osang ajanga ashir.

Palestine nunger telok Hamas-i Israel tsür Arbel Yehud aser danga ana Hokulbarnü tashinung chioktsü mulungogo ta Qatar-i sangdongba sülen nübörtem north leni tetsüng agi ayameso tenzü.

Netzarim Corridor ya hopta tatemlen chioktsü liasü, saka Yehud chioktsü mechi Israel-i iba corridor lapoktsü mapang atsülang.

La takum lir ta Hamas-i mediators tem dang osang sangdokja la chioktsü asoshi nungdakba kuli ajak agüjaka Israel-i ceasefire agreement nung aibelener, ta iba telok yagi shia liasü.

Ajsüaka Hombarnep Qatar indang Ministry of Foreign Affairs ajanga sangdong ka nung Hamas-i Yehud aser dangar ana Hokulbar matongdang chioktsü mulungogo ta shia liasü.

Israel-i October 7, 2023 nü nungi tenzüka Gaza nung tesem ajungalen amakdang Palestine nunger 47,306 tepsetogo aser 111,483 yirutsüogo. Iba anogo Hamas-i anir Israel amakdang nisung 1,139 tepset aser ano nisung 200 dak tema pua bener ao.

Iba tesem nung Israel-i anünglen aser alilen nungi ita 15 amakba mapang asürtem ya timba alitsü ta Palestine nungeri ashir, shirnoki ki o jen teraksa nungi nisung tasümgang tuteter.

Israel-i amakba ajanga Gaza nung nisung 2.3 million aliba nungi shilem 90 shi pei ki yutsür tesem balala nung jenok aser karbo aiben tesem melenshia liasü.

# M23 teloki DR Congo nung Goma yimti atsüngogo

**Goma, Aenjeti/January 27 (Agencies):** Rwanda-i teyari agütsüba M23 teloki sangdong ka ajanga, parnoki Democratic Republic of the Congo (DRC) anütoklen yimti tuluba Goma atsüngba indang metetdaksüba sülen ghonda ishika lir yimti kübok tesem balala nung prangbong akhaba ola angashio.

United Nations Security Council-i, raratep anentsü atema ayongzüker aliba mapang ka nung tang iba ya atalokogo.

UN sources anati Hombarnü arrotsü nung DRC aser Rwandan nunger sepaitem khatapba indang osang metetdaksür aliba mapang yimti atsüngba osang metetdakja liasü. M23 telok nungi sepaitemi linük kübok tesem balala atsüngyonga aoba mapang ano linük ana sepaitem khatapba ajanga tensa tamajungba küma aotsü ta tsübua bilemer.

M23 telok yagi Hombarnü sangdong ka ajanga parnoki yimti atsüngba metetdaksüogo. M23 teloki tesem balala atsünga aoba ya Rwanda-i rara jazükba ka lir ta DRC sorkari shio go aser UN-i ashiba agi, iba yimti atsüngba ajanga Goma nung aliba nübör million ana tetsübu agi süngdaksüogo.

M23 puri Congo sepaitem dang parnok bendanga agütsütsü asoshi ghonda 48 atakzüksüba tembangba sülen iba yimti atsüngba indang metetdakja liasü. Parnokisa Goma yimti nung alirtem dang maoksatapi süngjema alitsü aser DRC military züngsemtem dang central stadium nung adenshitsu

mepeshia metetdaksüogo.

Tenük kuli agütsür anati Reuters news agency dang ashiba agi, M23 pur Goma yimti tiyong tongogo. Tenarongnung kati prangbong hadir teperi bener aliba sepaitem yimtongtem süia aoba video tatsüka lemsatapa liasü.

M23 puri tesem balala atsünga aoba ajanga DRC nung aliba nübörtem aika pei talidak ki toktsür jenshiaogo aser küm aika mepetmesü nung aruba sülen iba ajanga ano rara tuluba küma aotsü ta tsübua bilemer.

M23 sepaitem aser Congo army aser UN peacekeepers tem Goma yimti tezülen anogo aika khatapa aruogo.

DRC anütoklen kin o kin tsüngda mangatettep adokba, telungpurtemi timtem agütsüba aser regional tsükchitepba ajanga küm semer dak tema timtema aruba sülen tang iba tongtibang yimti atema raraogo. Iba mepetmesü ajanga alima nung humanitarian crises tamajungtiba ka tenzükdakja liasü.

X nung post sütsüba video ka nung DRC sorkar otongdar Patrick Muyaya-i, civilian tem kümzüka toktsütsü ayongzüka den linük tang rara ama tensa ka nung lir ta ashi.

Goma atsüngtsü atema M23 pur tejakdangi aoba sülen kanga mepelai DRC-i Honibarnü Rwanda den tesendaktep kecha kidanger linük nem ya tenokdangba agütsütsü UN ayongzüka liasü.

Goma nung rara anentsü atema linük balalai ayongzüka mapang Kenya-i Deobarnü sangdong ka ajanga DRC tir

Felix Tshisekedi aser Rwanda tir Paul Kagame nati taruba anogo ana tsüngda summit ka nung adentsü atema mulunga agizükogo, ta ashi.

Kenya tir William Ruto-i lenir anaprongla dang, nübörtem aser parnok temeket nung aliba linük aser linük balalai yimjung asoshi ayongzüka angatsü mepeshia metetdaksüogo.

Ruto, shiba East African Community bloc tir lir pai ayongzüka tensa asadangtsü asoshi state tekolaktemjongdak senden ka amentsü, ta Kenya indang Ministry of Foreign Affairs principal secretary Korir Sing'Oei-i ashi.

Iba mepetmesü dak sendakba nung Deobarnü UNSC jongdak senden ka amenba mapang Congo nunger lenirtemi ashiba agi, Rawanda nunger sepaitem aika arrotsü adenogo, koba par linük sovereignty anema lir.

Kigali-i iba taitüsüba ya magizük aser tawa tensa mejungi akümba ya Kinshasa dak tai tongtlokja liasü.

UN expert temi ashiba agi, DRC nung rara aliba M23 telok nem teyari agütsütsü atema Rawanda-i sepai 3,000-4,000 yokogo aser missile aser sniper densema prangbong injang aser hadir aika agütsüogo.

Deobarnü menor UNSC-i, iba tesem nungi sepaitem anintsü ayongzü, saka shinga tenüng metetsi-i liasü.

UN tekolakba Antonio Guterres-i, DRC nungi sepaitem anintsü atema Rwanda ayongzüka sülen UNSC-i iba tayongzüka agüja liasü. Guterres tayongzüka ya Kigali-i magizüki liasü.

## Bumrah nem ICC Men's Test Cricketer of the Year naroküm agütsüogo



**Aenjeti/January 27, 2025**

**(Agencies):** India nunger pacer Jasprit Bumrah-i cricket asaya puti otsü nung pa tenzüng züngoksema 2024 küm atema ICC Men's Test Cricketer of the Year naroküm agizükogo.

Bumrah-i pa indang career nung tang tashi nung 2024 küm tajungtiba asayaba sülen tang iba naroküm ya agizükogo. Yiruba ajanga mapang talangka masayai lir 2023 küm tatemlen nungi pa Test cricket asaya tenzükba sülen pa kanga kara form dangi arua asayaogo.

2024 küm tepeyong India team nung bowler tem kidang aser bendanglen pa lenisüba nung asayaogo. Pai South Africa den Cape Town nung kanga junga asayaba den Border-Gavaskar Trophy nunga Australia team nem timtem tulu agütsüogo.

Bumrah-i asaya 13 nung dang wicket 71 agi aser pa ya Test asaya nung küm ka nung wicket timtiba agiba asayar kümogo.

2024 küm pa indang average 14.92 aser strike rate 30.1

liasü, koba run aika yanglua asayaba putu ka nung takok tulu ka lir.

Küm tepeyong kanga junga asayaba sülen Bumrah-i Test asaya nung wicket 200 dak tema agia pa ya India nunger bowler tem rongnungi iba alizüng tongtetba asayar 12buba kuma liasü.

Kidang England aser Bangladesh akokba asayamung nung Bumrah-i tongtibang shilem agi aser pai South Africa aser Australia nunga kanga junga asayaogo.

Border-Gavaskar Trophy nung pai kanga junga asayaogo aser pai asaya pongu nung wicket 32 agiba sülen pa nem Player of the Series naroküm agüja liasü.

Australia den Perth nung tanabuba Test asayaba mapang pai run 30 agütsür wicket 5 agiba ajanga India team-i iba asaya run 295 agi akokba nung teyari agüja liasü.

## Mendis nem Emerging Cricketer of the Year award agütsü

**Aenjeti/January 26, 2025**

**(Agencies):** Sri Lanka nunger lanur cricket asayar Kamindu Mendis-i küm tepeyong kanga junga asayaba sülen pa nem ICC Men's Emerging Cricketer of the Year naroküm agütsüogo.

Mendis-i 2024 küm cricket asaya format ajak nung run 1451 yanglu aser pa indang average 50 dak tema liasü. Mendis-i Test asaya 13 nung run 1000 yangluba sülen pa ya Sir Don Bradman den külemi Test asaya nung run 1000 takaratiba yanglurtem rongnung tasembuba nung lir.

Test asaya nung Mendis-i kanga junga asayaogo aser pai asaya teku nung run 1049 yanglu aser pa indang average 74.92 liasü.

Pa ya küm ka nung run 1000 dak tema yangluba asayar trokbuba dang lir. Pai 2024 küm century pongu aser half century asem yanglua liasü.



Mendi-i asaya aika nung kanga junga asayaogo, ajisüaka pai New Zaland den Galle nung tanabuba Test asayaba mapang mezüngbuba innings nung run 182 yanglua Sri Lanka team-i asayar 5 out sür run 602 yangluba nung teyari tulu agüja liasü.

Iba asaya nung pai four 16 aser six pezü züka liasü. Sri Lanka-i iba asayamung ya 2-0 agi akok aser pa nem Player of the Match award agüja liasü.

Mendis yagi kidang dang masü saka bendangalen oa asayaba mapanga kanga junga asayaogo. England nung oa asayaba mapang pa ya Sri

Lanka nunger rongnungi run timtiba yangluba asayar liasü aser küm ter sülen England nung mezüngbuba Test akokba mapang pai tongtibang shilem agi.

2024 masüadang pa Sri Lanka team tenüng nungi Test ka nung dang asayar liasü, saka pa küm tatemibo format ajak nung kanga tongtibang asayar ka kuma liasü.

Test asaya nung pai run aika yanglua asayaba ajanga Sri Lanka team ICC World Test Championship Final atema tokteper rongnung ka kümdakja liasü.

## Küm 34 sülen West Indies-i Pakistan nung Test ka kokogo

**Aenjeti/January 27, 2025**

**(Agencies):** West Indies team-i küm 34 sülen tang mezüngbuba Pakistan nung Test ka akokba mapang Jomel Warrican-i run 70 agütsür wicket 9 agia liasü. Iba asayamung ya team anapronglai asaya kaka koker tembangogo.

Spinner Warrican-i tanabuba innings nung run 27 agütsür wicket 5 agi. Multan nung tasembuba anogo Pakistan team batting amenba mapang parnoki run 133 dang yangluteta ghonda ka tsünga tanungba asayar ajak out süatok aser West Indies-i

asaya run 120 agi koka liasü.

West Indies team-i tatemsa Pakistan nung Test asaya ka 1990 küm November ita koker liasü. Iba sülen team ana tsünga Pakistan nung 1997 aser 2006 küm ta anaben dang asayaer liasü.

Tasemnübuba asaya akoktsü atema run 254 nüngdaka Pakistan team batting amen tenzükba mapang parnoki asayar 4 out sür run 76 yanglur liasü, saka Saud Shakeel mezüngbuba over nung Kevin Sinclair-i out süja liasü.

Iba sülen Nightwatcher Kashif Ali-a taruba over nung

Warrican-i out sütsü.

Muhammad Rizwan shibai run 25 yanglu, pa aser Salman Ali Agha (15) nati mapang tatsüka nokdak saka tenaprongla Warrican-i out sütsü. Iba mapang tashi nung Pakistan team-i asayar 8 out sür run 128 yanglur liasü.

Maneni Gudakesh Motie-i Noman Ali out sütsüba sülen WI team asaya akoktsü renemtepa aliba mapang Warrican-i Sajid Khan out süja parnoki takok angu.

Iba asayamung nung Warrican-i wicket 19 agi aser pai ajak dang wicket timtiba agiba asayar liasü.

## Uttarakhand nung 38buba National Games asayatsü

**Aenjeti/January 27, 2025**

**(Agencies):** 38buba National Games Uttarakhand nung Mongolbarnü nungi tenzüka asayatsü. Asaya balala tesem tenet nung lemsar asayaba angutsü.

Asayamung nung nungtugu asayatem aikati shilem magitetsü saka tanga asayar meyrejang aikati shilem agiba angutsü.

Ato Kilonser Narendra Modi-i anogo 18 asayatsü aliba iba asayamung ya Rajiv Gandhi International Cricket Stadium nung tenzüksütsü. Asayamung nung team 38 nungi asayar 10,000 shi-i shilem agitsü.

Asayatem dang züngdangra iba asayamung nung alima nung asayamung tulutiba rongnung ka lir, saka iba ajanga linük international jenjang nung ajanzükdaksüba kangabo mangur.

Taküm iba asayamung ya Uttarakhand kübok yimti tenet nung asayatsü aser venue tem rongnung tongtibaji Dehradun asütsü.

Asayamung koba February 14 tashi asayatsü lir iba atema tanga asayaba tesemtemji Haridwar, Nainital, Haldwani,

Rudrapur, Shivpuri aser New Tehri asütsü.

National Games ya tatemsa 2023 küm Goa nung yimti pongu nung asaya liasü.

Asayamung nung athletics, swimming, shooting, wrestling, badminton, hockey, boxing, weightlifting, football, tennis aser aser table tennis amala Olympics nung asayaba tongtibang asayatem asayatsü. Iba den kabaddi aser kho kho amala sobaliba asayatema asayaba angutsü.

Kasa mapang nung Kalarippayattu, yogasana, mallakhambh aser rafting nungera iba asayamung mapang sayatsü (non-medal).

Shooting dak alaka Olympics nung tongtibang asayatem nung asayatem timba maparen balala aliba ajanga National Games nung masayatetsü.

Manu Bhaker aser Esha Singh na dak alaka taoba küm Paris Games nung asayaba shooter tem ajak iba asayamung nung asayatsü.

Meghalaya nung taruba National Games ayongzüka asayatsü aser iba ya ita ka ana tsünga sangdongtsü imlar.

## BENDANGLI OSANG : Tapak 7 nungi...

### Tsökoker aliba Jeju Air tayimtsü gol...

Boeing 737-800 indang gol tem ya rangsatsü aser concrete structure ya maneni asadangtsü, ta report ajanga ashi.

Jeju Air tayimtsü ya December 29 anepdang Bangkok nungi ayameso aser linük south-west nung aliba Muan International Airport-i aorba liasü.

Pilots temi airport den jembir minute asem lir anepdang 8:57 ako meta control tower ajanga tayimtsü ketdangsur dang ozü aliba indang tekumdangtsü shia liasü.

Anepdang 8:59 ako meta pilot ajanga tayimtsü nung ozü agi tsükogo ta ashi aser lendong lir ta sangdonga liasü.

Iba sülen pilot ajanga tayimtsü ya mashilen nungi anentsü temelaba asüngdang aser iba mapang landing gear meyoki tayimtsü tepok agi ali nung kongshi aser runway alema oa concrete structure nung süker apok, ta report ajanga ashi.

Ketdangsur temi mezüngbo tayimtsü nung aliba

flight data aser cockpit voice records ya lendong ataloktsü minute pezü shi lia record asüba anenadok ta shia liasü.

Mongintem iba mesük tayimtsü tsükokba nung densema alirtemi runway tatem nung concrete barriers aliba indang asüngdang aser karibo yangji concrete barriers ya mali asübo asü-amar tajemba lila ta ashir.

Concrete structure nungya navigation system yua lir, koba ajanga tayimtsü anenba nung yariteper, aser iba dangji localiser ta ajar.

South Korea indang transport ministry ajanga iba system dang linük nung danga airport tem aser bendang lima nunga angutsü ta ashir.

Taoba hopta ketdangsur temi linük nung airports tenet nungi navigation atema amshiba concrete barriers ya melentsü ta sangdong.

Iba preliminary report ya United Nations indang aviation agency, United States, France aser Thailand ketdangsur nem agütsüogo.

## BILEMDANGANG

"Minykdang tashibo ajak tamakoktsü ama dang bilemer."